



PUTERA Edward serta isteri diberi sambutan meriah setibanya di BMI. -
Gambar oleh Salim Shaari

Putera Edward lawat BMI

BRITISH Malaysian Institute (BMI) yang terletak di Gombak, mencatat sejarah tersendiri apabila tetamu diraja Britain, The Earl of Wessex Putera Edward merasmikan dua makmal multimediana, Isnin lalu.

Putera Edward yang dalam rangka lawatan ke negara ini merasmikan Makmal Multimedia Rolls Royce dan Makmal Komputer Bank Standard Chartered British Malaysian Institute (BMI).

Hadir sama pada majlis itu, isteri beliau The Countess of Wessex, Sophie Rhys-Jones; Menteri Pembangunan Luar Bandar, Datuk Azmi Khalid dan isteri, Datin Jasmin Abdullah; Pesuruhjaya British ke Malaysia, Graham Fry dan Pengerusi

Mara, Datuk Abu Seman.

Berucap pada majlis itu, Putera Edward berkata tiga perkara perlu diberi perhatian utama untuk meningkatkan hubungan erat antara kerajaan British dan Malaysia.

Ini termasuk meningkatkan kerjasama di bidang pendidikan dan teknologi terkini khususnya dalam menjayakan program teknologi maklumat dan komunikasi dan Koridoraya Multimedia (MSC).

Beliau juga menggesa syarikat British di negara ini supaya memberi sumbangan bagi menjayakan pelbagai program dan projek seperti yang dilakukannya antara syarikat Rolls Royce dan Bank Standard Chartered dengan BMI.

Kerjasama kedua-dua

pihak berkenaan membina makmal berharga RM1.245 juta itu besar ertinya dan baginda mengucapkan tahniah dan terima kasih di atas sumbangan yang diberikan dalam membantu membangunkan pendidikan di negara ini.

Sementara itu, Azmi ketika berucap berkata, kerjasama erat dalam pelbagai bidang khususnya pendidikan antara kerajaan Malaysia dan British penting dalam pembangunan pendidikan negara.

Selain sumbangan dalam pembinaan BMI, katanya kerajaan British turut membantu dalam operasi dan pembangunan BMI yang menelan belanja keseluruhan RM86.4 juta di tanah seluas 7.2 hektar di Jalan Pusu, Gombak.